

DIZRA' CHEE DIOS DA BZUAJ SANTIAGO

Santiago dxuzuaje' chee benne' ca' zaj nadxúaje' lazrie'

¹ Neda', Jacobo, naca' wen zrin chee Dios, ne chee Xránadxu Jesucristo. Dxugapa' le'e diuzre. Nácale chazrinnu cue' zri'ine zre sua Israel, ne nase dínnajle du gabí'i xezr la xu nigá.

Xel-la' sina da za lu na' Dios

² Benne' bícha'dau', dxal-la' béle'ele gate dxedele zane cue' da stēbe ca', ³lawe' da nézele gate dxedé xel-la' dxeajlí lazre' chee lu da stēbe, da nigá dxundxa na le'e zren lazre'. ⁴Le gun ba xuzre gaca li lazre' xel-la' zren lazre' chee chee gácale benne' xrlátaje ne li lazre', ne quebe bi xázrjele.

⁵ Che núlale le'e dxexázrjele xel-la' sina, le naba na lau Dios, na' Le' gunne' na le'e, lawe' da dx-unézrujle'e Dios chee xúgute bēneache, ne quebe dxexezúene' zi'. ⁶Dxal-la' nábale nen dutē xel-la' dxeajlí lazre' chee, ne quebe gun chupa lázrele. Benne' dxun chupa lazre' naque' ca xeajxruza chee nísadau' da dxua be' nila na'la. ⁷⁻⁸ Benne' dxune' caní, ne quebe zrize dxezúa lázrdawe', ne quebe tuz ca dxun xichaj lázrdawe' quebe dxal-la' guéquene' bi da xunezruj Xránadxu chee'.

⁹ Tu benne' bíchedxu naque' baxache' dxal-la' bene' lawe' da guzúa Dios le' ca tu benne' zaca. ¹⁰ Benne' nape' xel-la' gunní'a dxal-la' bene' gate gun Dios le' dxexruj lazre' lawe' da naca benne'

gunní'a ca tu xiaj xixre' da quebe dxezí béateca na. ¹¹ Gate dxalaj gubizra, ne dxennále'e na, na' dxebizre xixre' na, na' dxexruj xiaj chee na, na' dxedé xel-la' xrtan chee na. Cá'aqueze gaca chee benne' gunní'a, xenitié' dxácaté na' dxezí' lu ne'e xel-la' gunní'a.

Ca naca chee da stebe ca' da dxededxu

¹² Ba neza naca na chee benne' dxuchaga lawe' da stebe ca' dute xel-la' zren lazre' chee', lawe' da che ba bedxúaje' chawe' lu da stebe da dxedé'e, na' si' lu ne'e da nachebe lazre' Dios gunézruje' chee benne' ca' zaj nazri'ine' Le'. ¹³ Gate nu benne' zua da dxegú'u xel-la' na le' chee gune' da calela, quebe dxal-la' guéquené' dxuzúa Dios da na' dxegú'u xel-la' na le', lawe' da quebe bi de da seque' xegú'u xel-la' na Dios chee gune' da calela, ne quebe bi guzúa Dios da xegú'u xel-la' na dxi'u chee gundxu da calela. ¹⁴ Tu benne' zua da dxegú'u xel-la' na le' chee gune' da calela gate xel-la' dxezá lazre' da calela chee' dxecá'a na le', ne dxenná be'e na le'. ¹⁵ Nadxa ca naca xel-la' dxezá lazre' da calela caní dxuluzán na dul-la, na' gate ba guzeque' zua dul-la na, na' dxute na bēnea'.

¹⁶ Benne' bícha' dau' nazri'ite lazra', quebe güele lataj nu si xe le'e. ¹⁷ Xúgute da zaj naca xrlátaje ne da zaj naca li lazre' da dxezidxu zá'aca na xabáa lu na' Dios, Bēnea' bene' da ca' dxulusení na zran xabáa. Dios quegá dxuchá cuine', ne quebe dxuché'e ca dxune'. ¹⁸ Ca naca da guca lazre' Dios, ba benne' dxi'u xel-la' nabán. Bchínene' dizra' li chee', chee gácadxu ca tu lina nedxu chee', chee da ba ben Le'.

Xel-la' dxucá'ana szren Dios da naca na li lazre'

¹⁹ Chee le na', benne' bícha'dau' nazri'ite lazra', tu tule le'e dxal-la' gácale ban lazre' chee xénele, san dxal-la' cueza lázrele ca da nnele ne quebe la' zrá'atele. ²⁰ Tu benne' xichaj zra'a quebe dxune' da dxezaca ba lazre' Dios. ²¹ Chee le na', le gusán xúgute da sban ne ca naca da calela da dxanle'e na, na' dutę xel-la' dxexruj lazre' chee le si' ca naca dizra' chee Dios da ba naxaza na lu xichaj lázrdaule, lawe' da wazeque' dizra' na' guselá na bėnne'du xu'ule.

²² Le gun ca da dxulé'e dizra' na' le'e, ne quegá xénezele na. Benne' dxénzene' na dxezí xeze cuine'. ²³ Bėnnea' dxénzene' dizra' na', ne quebe dxune' ca dxenná na, naque' ca tu benne' dxenné'e lawe' tu lu wana'. ²⁴ Dxenné'e ca naque', na' gate ze xeajze' na', na' dxal-la' lazre' ca naque'. ²⁵ Benne' dxenná' xánnie' ca da bdxixruj be'e Dios da naca na li lazre', ne da dxuselá na dxi'u, ne dxusédie' ca naca na, ne quegá dxénzene' na, quebe dxal-la' lazrte' na. Che dxune' ca naca na, benne' nigá gaca tu da ba neza chee' lu xúgute da dxune'.

²⁶ Che nu benne' dxéquene' naque' benne' dxucá'ana szren Dios, ne quebe dxezéquene' nna be'ene' luzre', benne' nigá dxezí xeze cuine', na' ca naca xel-la' dxucá'ana szren Dios chee' dácheze naca na. ²⁷ Xel-la' dxucá'ana szren Dios da naca na du lazre', ne da naca na da dxezaca ba lazre' Xradxu Dios naca na caní: Gácale dxu bidu ca' zaj nazebe, ne nu'ula ca' ba zaj nate benne' biu chee' gate zaj zue' lu da zi' da xa', ne quebe gundxu ca naca da sban chee' xęzr la xu nigá.

2

Quebe guchale ca gunle chee tu tu benne'

¹ Benne' bícha'dau', le'e dxéajle chee Xránadxu, Benne' xabáa Jesucristo, quebe dxal-la' guchale ca gunle chee tu tu benne'. ² Che chu'u tu benne' naga nazrágale, ne nácuē' zra lanē' da zaca, ne xu'u da naca na oro lu xrube ne'e, na' cá'anqueze che chu'u tu benne' xache', ne nácuē' zra lanē' tuzruj, ³ na' che dxelé'ele cháwedau' bēnnea' nácuē' zra lanē' da zaca, ne dxēle le': "Gudxe'e nigala naga nácadxa na chawe'", na' dxēle benne' xache' na': "Xeajsé na'la, u gudxe'e lu xu ná'teze." ⁴ Che dxunle caní, dxuchale ca dxunle chee tu tu benne', ne dxuchí'ale ca zaj naca bēnneache, quebe naca xrlátaje xichaj lázrdaule.

⁵ Benne' bícha'dau' nazri'ite lazra', le xen da nigá: Dios ba guqué'e benne' ca' zaj naque' benne' xache' lu xezr la xu nigá chee xelaque' benne' gunní'a lu xel-la' dxeajlí lazre', ne chee xelezí' lu ne'e da nucueza Dios naga dxenná bea Le', da na' guchebe lazre' Le' gunézruje' chee benne' ca' zaj nazri'ine' Le'. ⁶ Le'e dxuzúale chalá'ala benne' xache' ca'. ¿Quegá benne' gunní'a ca' benne' dxuluchínene' le'e, ne dxelech'é le'e lau benne' xulawe' ca'? ⁷ ¿Quegá benne' gunní'a ca' benne' dxelenné' schanni' chee da xrlátaje ca nazí' lale, dxennale nácale bi chee Cristo?

⁸ Che da li dxunle ca dxenná da nadxixruj be'e Dios, da nácadxa blau ca da naxúaj na lu xiche lá'azxa, dxenná na: Bzri'i biche ljwezru' ca nazrí'i cuinu', xrlátaje dxunle. ⁹ Na'a che dxuchale ca dxunle chee tu tu benne', dul-la dxunle, ne

nabágale zria lawe' da quebe dxunle du ca bdxixruj be'e Dios. ¹⁰ Che tu benne' dxuné' ca zaj naca da nadxixruj be'e Dios, san che dxenéguene' ca naca tuze da nadxixruj be'ene', naca na cáteze nabague' zria ca zaj naca xúgute da nadxixruj be'e Dios. ¹¹ Léqueze Dios gunné': "Quebe gunle dul-la da dxichaj na xrba chee xel-la' wechaga na", cá'unqueze gunné': "Quebe gútele benne'." Caní naca, che tu benne' quebe dxuné' dul-la da dxichaj na xrba chee xel-la' wechaga na', san che dxutie' benne', ba gunéguene' ca da nadxixruj be'e Dios. ¹² Le'e dxal-la' guchálajle, ne gunle ca dxal-la' xelún benne' ca' guchi'a Dios ca da dxeluné', benne' ca' zaj nalá lu na' da gunná bea Le'. ¹³ Benne' ca' quebe dxelexexache lazre' chee benne' xula, Dios guchi'e ca da dxelún benne' ca', ne quebe xexache lazre' chee benne' ca', san benne' ca' dxelexexache lazre' chee benne' xula quebe bi zria xeleguete gate Dios guchi'e ca da zaj nun benne' caní.

Ca naca chee xel-la' dxeajlí lazre', ne chee zrin dxundxu

¹⁴ Le'e, benne' bícha'dau', ¿bizra culuén gapa na che tu benne' dxenné' dxeajlí lazre' Cristo, na' quebe bi dxuné' da dxácalen nu benne' dxexázejne'? ¿Wazeque' xel-la' dxeajlí lazre' na' guselá na le'? ¹⁵ Che zra' benne' bíchedxu u nu'ula zandxu, benne' quebe bi zaj de zra lané' u da xelawe', ¹⁶ na' che núlale le'e xeje benne' ca': "Bexiajzé cháwedau'. Nazré'enu', ne gágugu' szri'", san che quebe bi gunézrujle ca da dxexázejne', ¿bizra culuén gapa da na' gunnále? ¹⁷ Caní naca na chee xel-la' dxeajlí lazre'. Che quebe bi zaj de da chawe'

da xululé'e na che dxeajlí lazre' bénnea' Cristo, xel-la' dxeajlí lazre' chee' naca na ca tu da gate.

¹⁸ Wannalja nu benne': Lue' dxennáu' dxéajle'u chee Cristo, na' neda' dxuna' da chawe' ca'. Ble'e neda' dxéajle'u chee Cristo ne quebe dxunu' da chawe' ca', na' neda' gulé'eda' lue' dxeajlí lazra' Cristo ne chee da chawe' ca' da dxuna'. ¹⁹ Dxéajle'u lue' zua tuze Dios. Nácaqueze na ca'. Cá'anqueze da xriwe' ca' dxeléajle na, ne dxelezrize na lu xel-la' dxelezrebe. ²⁰ Lue', benne' xala, ¿dxaca lazru' gulé'eda' lue' naca xel-la' dxeajlí lazre' ca tu da gate che nu benne' dxeajlí lazre' Cristo na' quebe bi zaj de da chawe' da xelunna bea na? ²¹ ¿Ájazra guca chee xra xrtáudxu Abraham guque' benne' xrlátaje lau Dios? Guca na ne chee da bene' gate guxúe' zrí'ine' Isaac lu bdupa xiaj chee guzezxe'-be'. ²² ¿Quebe dxele'enu'? Ca da ben Abraham dxulé'e na guxeajlí lazre' Dios, na' xel-la' dxeajlí lazre' chee' guca na du lazre' ne chee da bene'. ²³ Caní guca li ca da dxenná na lu xiche lá'azxa: Abraham guxéajle'e chee Dios, na' Dios blé'ené' le' benne' xrlátaje. Na' bchálaje' ca naca chee Abraham, gunné': "Bi zrágaqueza', Abraham."

²⁴ Na'a dxelé'ele Dios dxezí' lu ne'e tu benne' ne chee da chawe' da dxune', ne quegá tuze lawe' da dxeajlí lazre' Le'. ²⁵ Cá'anqueze guca chee Rahab, nu'ula wen da sban. Nu'ula nigá gulu'e lizre' benne' ca' gusel-la Josué, na' bsi'e benne' ca' neza xula chee belelé' lu na' benne' ca' dxjaque' wedilla, na' ne chee da bene', Dios guzí' lu ne'e nu'ula na'. ²⁶ Ca naca chee bela' dxen cheedxu, che ba bedxúaj be' chee na, ba nate na, cá'anqueze naca

chee xel-la' dxeajlí lazre' cheedxu. Che quebe bi zaj de da chawe' da xululé'e na dxeajlí lazrdxu Cristo, naca na ca tu da gate.

3

Ca naca chee lúzredxu

¹ Benne' bícha'dau', quebe dxal-la' gun cuínale benne' dxulusede dizra' chee Dios, lawe' da nézele ca gun Dios, guchi'a xánnedxe' chee da dxundxu dxi'u, dxuchálajdxu xrtizre'. ² Xúgutēdxu dxúnle'edxu da calela. Che nu benne' quebe bi da calela dxunē' ca naca da dxuchálaje', naque' benne' li lazre', na' wazéquene' nna be'ene' ca nácaqueze be'la' dxen chee'. ³ Gate dxugú'udxu xia dxu'a bzrina' chee gunba' da dxaca lazrdxu, wazéquedxu nna be'edxu duteba'. ⁴ Le na' xque ca naca chee da ca' dxeledán lawe' nísadau'. Lácala zaj naca na da zri'a, na' be' da dxuzriga na le na dxácale'e na, benne' dxusé'e na dxuchínene' tu xágadauze, na' dxenná be'ene' na chee cheaj na naga dxaca lazre' le'. ⁵ Cá'anqueze naca chee lúzredxu. Naca na tu da dauze da naca chee be'la' dxen cheedxu, na' da zrentē da dxenná na. Tu xí'dauze waca guzezxe na tu xi'a zren. ⁶ Lúzredxu naca na ca tu xi'. Lúzredxu naca na ca tu xezr la xu sban da zua lu be'la' dxen cheedxu, ne dxuxrinnaj na du ca nácadxu. Zúale ca tu xi' lúzredxu da za' lataj ba xa', ne naca na ca tu da dxegú'u na xi' ca naca xúgutē da dxundxu. ⁷ Wazeque' nu benne' nna bé'ene' xúgutē be' xixre' ca', ne be' zaj zua xrila, ne be' snia ca', ne be' zaj zra' lu nísadau', ne ba gunná bé'ene'-ba'. ⁸ Quebe nu benne' dxezéquene' nna bé'ene' dute da dxenná luzre'. Naca na tu da

calela da quebe dxue na lataj nu nna be'e le na, ne naca na ca tu be snia, be dxúteba' bènneache ca'. ⁹ Nen lúzredxu níqueze dxue lá'anadxu Xradxu Dios, ne nen le na dxennéquezdxu da calela chee bènneache, benne' ca' nun Dios na' lu'a le saca Léqueze'. ¹⁰ Lu dxú'adxu ná'queze dxeledxúaj da xrlátaje ne da calela. Benne' bícha'dau', da nigá quebe dxal-la' gaca na ca'. ¹¹ ¿Waca galaj nisa chawe' ne nisa sla' lu tuze beaj? ¹² Benne' bícha'dau', ¿waca tu xaga higo cuía na da zixre chee xaga olivo? ¿Waca tu lba uva cuía na da zixre chee xaga higo? Cá'anqueze, tu beaj quebe gaca gunna na nisa xene', ne nisa zri lazre'.

Xel-la' sina da naca li lazre'

¹³ Che zua tu benne' ládujla le'e naque' benne' sina, ne dxéajni'ine', dxal-la' gul'éne' na ne chee da chawe' da dxune' duté xel-la' dxexruj lazre' chee' da dxunezruj xel-la' sina le'. ¹⁴ Che zua lu lázrdaule xel-la' zre'e lazre' ne xel-la' xa lazre', quebe dxal-la' gucá'ana szren cuínale ca naca xel-la' sina chee le lawe' da caní nnele da wen lazre' chee da naca da li. ¹⁵ Xel-la' sina caní quebe naca na chee Dios. Naca na chee xezr la xu nigá, ne chee bènneache, ne za na lu na' da xriwe'. ¹⁶ Naga zua xel-la' zre'e lazre' ne xel-la' xa lazre', na' zaj zra' benne' wechacha ca', ne dxelune' xúgute da calela. ¹⁷ Benne' zaj nape' xel-la' sina da dxunna Dios zaj naque' du lazre', ne zren lazre', ne dxe'ene lazre', ne dxexruj lazre'. Dxelexache lazre' ljwezre', ne dxelune' da chawe'. Zaj naque' li lazre' ne quebe dxelune' cúzreze da chawe'. ¹⁸ Benne' dxelebeche zrie' da ba xa' dxelune' tu zrin da naca ca tu binne da dxunna na da chawe'.

4

Ca naca chee benne' zaj nazri'ine' da zaj naca chee xezr la xu nigá

¹ ¿Bizr chee na' dxedíl-lale ne dxe' da ba xa' ládujla le'e? Dxaca caní lawe' da dxezá lázrele da zaj naca chee da calela, da dxuluzúa na le'e lu da ba xa'.

² Le'e dxaca lázrele bi gápale, na' lawe' da quebe dxezrué'ele na, na' dxútele benne'. Dxezá lázrele tu da sile, na' lawe' da quebe dxezéquele sile na, na' dxedíl-lale ljwézrele, ne dxebéquele da ba xa'. Quebe dxezile ca da dxezá lázrele lawe' da quebe dxenábale na lau Dios. ³ Che dxenábale na, quebe dxezile na lawe' da dxenábale na calela, lawe' da dxedánele na chee guchínele na ca da dxaca lázrele.

⁴ Le'e, benne' quebe nácale li lazre', ¿quebe nézele che nu benne' dxedánnene' da calela da de lu xezr la xu nigá, benne' nigá dxecuídene' Dios? Núteteze benne' dxaca lazre' si'e ba neza ca da dxaca lu xezr la xu nigá naque' benne' dxecuídene' Dios.

⁵ Chee le na' dxenná xiche lá'azxa: Be' da nuzúa Dios lázrdaudxu cadite dxe'e gunne xue cheedxu.

⁶ Dios dxácale dxene' dxi'u lu xel-la' xrlátaje chee', ca dxenná xiche lá'azxa: Dios dxezré'e benne' ca' dxulucá'ana szren cuina, na' duté xel-la' xrlátaje chee' dxácale ne' benne' dxexruj lazre' ca'.

⁷ Le guzúa dizra' chee Dios.

Le til-la da xriwe', na' le na xuzrunnuj na naga zrale.

⁸ Le biga lau Dios, na' Le' bigue' naga zúale le'e.

Le'e, benne' dul-la, le gupá'a cuínale chee dul-la da nabágale.

Le'e, benne' quebe nazri'ile Dios du lázrele, le gaca benne' du lazre'.

⁹ Le guzua ba xa' lázre'le.
 Le cuezre, ne le gaca xache' lazre'.
 Québedxa guzrízrele, na' le cuezre.
 Québedxa bele, ne le xewine lazre'.

¹⁰ Le gaca dxexruj lazre' lau Xránadxu, na' Le' gucá'ana szrene' le'e.

Quebe dxal-la' guchí'adxu ca da dxun tu benne' bíchedxu

¹¹ Le'e, benne' bícha'dau', quebe nnele chee ljuwézrele tule xetule. Benne' dxenné' chee tu benne' bíchedxu, u dxuchi'e ca da dxun bénnea', naque' benne' dxenné' calela chee da bdxixruj be'e Dios, ne dxebé' ca zaj naca da bdxixruj be'e Dios. Che dxebéu' ca zaj naca da bdxixruj be'e Dios, dxun cuinu' ca benne' dxuchi'e da dxaca, ne quebe dxuzú' dizra' da bdxixruj be'e. ¹² Zua tuze Dios, Bénnea' bdxixruj be'e da ca', ne dxuchi'e da dxaca, na' Léqueze' wazéquene' guselé' dxi'u, ne guzría xi'e dxi'u. Lue', ¿núzraqueze nacu', dxuchi'u da dxun benne' xula?

Quebe nezdxu bi gaca wxre

¹³ Na'a, le xene da nigá, le'e dxennale: Na'a u wxre chéajdxu tu xezre ne cheajsúadxu na' tu iza. Gá'udxu, ne gútedxu chee gucúdedxu dumí.
¹⁴ Quebe nézele ca da gaca wxre. ¿Ájazra naca chee xel-la' nabán cheedxu? Naca na ca tu beuj da dxebé' tu chi'i, na' chadí dxenite na. ¹⁵ Da dxal-la' guchálajle naca caní: Che Xránadxu dxaca lazre', gaca bandxu ne gundxu da nigá u da na'. ¹⁶ Le'e dxucá'ana szren cuínale ca da dxuchálajle. Xel-la' dxucá'ana szren cuina caní naca na da calela.

17 Che nu benne' ba nézene' ca da chawe' da dxal-la' gune', na' quebe dxune' na, na' bágale'e dul-la.

5

Santiago dxusízrene' benne' gunní'a ca'

¹ Le xene da nigá, le'e, benne' gunní'a. Le cuezre ne le xewine lazre' ca naca da zi' da xa' da lé'ele. ² Ca naca xel-la' gunní'a chee'le ba zaj nuzru na, na' zra lánale zaca ba zaj nagu béadu ca' le na. ³ Ca naca oro chee'le ne plata chee'le, ba gulezén xrche'e na, na' lawe' da quebe bchínele da gunní'a chee'le lu da xrlátaje, da caní dxululé'e na nabágale zria lau Dios, na' Le' gudée' le'e lu da ba xa'. Caní gaca chee'le lawe' da btúbele xel-la' gunní'a chee' gápale na gate ba dxéxrule. ⁴ Quebe gudízruje ca naca chee' na benne' ca' belexelape' lina chee'le, na' dxelawe' zria chee' da quebe gudízruje, na' Xránadxu, Bénnea' nape' duté xel-la' dxenná bea, ba benne' ca naca zria da dxelagu benne' ca' chee'le le'e. ⁵ Lu xezr la xu nigá ba guzile ba neza xel-la' gunní'a chee'le ne xúgute da zaca ca', ne guzrenle ca tu bezre dxánnele'e, na' ba dxezrín zra xelútié'-ba'. ⁶ Le'e ba bzria xile, ne ba bétele benne' quebe bi da calela zaj nune', na' benne' ca' quebe guledábague' le'e.

Dxal-la' gácadxu benne' zren lazre' ne guchálajledxu Dios

⁷ Chee' le na', benne' bícha'dau', le gaca zren lazre' ca zrindxa zra xelá' Xránadxu. Benne' dxaza dxa'ana dxal-la' cueze' duté xel-la' zren lazre' chee' ca zrindxa zra xelá' xiuj ba ne xiuj lina, chee' xezí' lu ne'e lina chawe' chee'. ⁸ Cá'aqueze le gaca zren lazre', ne quebe gute lázrele, lawe'

da ba zua gagu zra xelá' Xránadxu. ⁹ Le'e, benne' bícha'dau', quebe gágule zria chee ljwézrele, chee quebe guchi'a Dios chee da dxunle, lawe' da zua gágute zra xelá' Dios, Bénnea' dxuchi'e da dxaca. ¹⁰ Le'e, benne' bícha'dau', le gusá lázrele ca guca chee benne' ca' gulenné' waláz chee Dios, gulaque' zren lazre' lácala guledé' xel-la' zi'. ¹¹ Dxennadxu guca da ba neza zren chee benne' ca' buluchaga lawe' xel-la' zi' ca'. Le'e ba benle ca benne' zren lazre' guca Job, ne ba nézele ca da chawe' ben Dios chee' ca gudé na'. Xránadxu naque' zri'i lazre', ne dxexache lazre' dxi'u.

¹² Da dxundxa na ba xen, benne' bícha'dau', quebe guzétajle xabáa, ne quebe guzétajle da zua xezr la xu nigá, ne quebe bi da xula guzétajle. Gate nnale: Awe', le nnaze: Awe', ne gate nnale: Cabí, le nnaze: Cabí, chee quebe guzría xi' Dios le'e.

¹³ Che núlale dxedele lu da zi' da xa', dxal-la' guchálajlenle Dios. Che nu benne' zue' xel-la' dxebé, dxal-la' gul-le' da güe lá'ane' Dios. ¹⁴ Che nu benne' quebe chawe' zue', dxal-la' nne' benne' gula ca' dxuluxúe' bi chee Cristo, chee xelenabe' lau Dios xexune' benne' we' na', ne xelegú'e le' da za lu La Xránadxu. ¹⁵ Gate dxuluchálajlene' Dios dute xel-la' dxeleajlí lazre' chee', na' xexaca benne' we' na', na' Xránadxu xechise' le', ne che bi dul-la nune', na' gunité lau Dios chee bénnea'. ¹⁶ Chee le' na', le xrúalepe lau ljwézrele tule xetule dul-la da nunle, ne le guchálajle Dios chee tule xetule, chee xexune' le'e. Da dxenaba benne' xrlátaje du lazre' lau Dios wazrué'ene' na'. ¹⁷ Elías, bénnea' gunné' waláz chee Dios, guque' tu bénneache ca dxi'u, na' gate gunabe' lau Dios chee quebe gaca

xiuj, na' quebe guca xiuj lu xezr la xu dute chun iza xugachaj. ¹⁸ Gudé na', gate gunabe' lau Dios da xula, na' belá' xiuj, na' xezr la xu na' benna na lina.

¹⁹ Le'e, benne' bícha'dau', che nu benne' ládujla le'e dxecuase' lu da li, na' che núlale le'e xegu'ule le' lu xel-la' li, ²⁰ dxal-la' nézele, núteteze benne' xucuae' tu benne' dul-la lu neza calēla da zeajleñe', guselé' bēne'du xu'u benne' dul-la na' lu xel-la' gute, na' xunite lau Dios dul-la zan da nabaga bēnea'.

**Xela wezria cube nen salmo ca’
New Testament and Psalms in Zapotec, Tabaa
(MX:zat:Zapotec, Tabaa)**

copyright © 1981 Wycliffe Bible Translators, Inc.

Language: Zapotec, Tabaa

Translation by: Wycliffe Bible Translators, Inc.

Zapoteco, Tabaa [zat], Mexico

Copyright Information

© 1981, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament and Psalms

in Zapotec, Tabaa

© 1981, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files
dated 29 Jan 2022

80626b72-93df-58ae-9f5e-9d86733fab46